

# Inuussutissarsiutigalugu piniarsinnaanermut allagartat pillugit Namminersorlutik Oqartussat nalunaarutaat

Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi, Inatsisartut inatsisaat nr. 1, 16. maj 2008-meersukkut allanngortinneqartumi, § 6, § 12, § 13, imm. 1 aamma § 17, imm. 2, malillugit aalajangersarneqarput:

## Atuuffia

**§ 1.** Nalunaarut una Kalaallit Nunaata nunataani aalisarnikkullu oqartussaaffigisaani inuussutissarsiutigalugu piniarsinnaanermut aallaaniarsinnaanermullu atuuppoq.

*Imm. 2.* Nalunaarummi uumasut miluumasut timmissallu tamarmik pineqarput.

## Akiliuteqartitsinerup aalajangersaavigineqarnera

**§ 2.** Piniarnermut allagartanut akiliuteqartitsinermi akigititassap annertussusaa qaammatisiutit ukiuat naallugu Piniarnermut Naalakkersuisumut ilaasortamit aalajangersarneqartassaaq, ukioq kingulleq allaffissornikkut ingerlatsinermilu aningaasartuutit tunngavigalugit.

*Imm. 2.* Inuussutissarsiutigalugu piniarnermut allagartap tunniunneqarneranut akiliutissaq annertussuseqarpoq 250 kr.-nik.

## Inuussutissarsiutigalugu piniarsinnaanermut aallaaniarsinnaanermullu akuersissuteqartarneq

**§ 3.** Inuussutissarsiutigalugu piniarsinnaanermut allagartaq killissarititaasut inatsisini allani aalajangersarneqartut iluanni piniarnissamut aallaaniarnissamullu pisinnaatitsivoq.

*Imm. 2.* Kalaallit Nunaanni pinerluttulerineq pillugu inatsit naapertorlugu, sakkut ulorianartut inunnut 12-it inorlugit ukiulinnut tunniuteqqusaanngillat, tamanna naapertorlugu taamatut ukiutigut killigititaq ataallugu ukiullit piniarsinnaanermut allagartamik tunineqarsinnaanngillat.

## Inuussutissarsiutigalugu piniarnermut allagartartaarniarluni qinnuteqarneq

**§ 4.** Inuussutissarsiutigalugu piniarnermut allagartassamik qinnuteqarneq pisinnaavoq immersuffissamut Piniarnermut Naalakkersuisoqarfimmit ilusilersugaq atorlugu kommunimut najugarigisamut nassiunneqarneratigut imaluunniit Internet-imik aallaavilik atorlugu nassiunneqarneratigut.

*Imm. 2. Piniarnermut allagartamik qinnuteqartumut itigartitsisoqartillugu, najugarisami kommunerisamit tamatuminnga qinnuteqartoq ilisimatinneqassaaq, Piniarnermut aallaaniarnermullu Inatsisartut inatsisaanni piumasarineqartut qinnuteqartumit naammassineqannginneri peqqutigalugu. Allakkatigut nalunaarutigineqarnerata assilinera Piniarnermut Naalakkersuisoqarfimmut nassiunneqassaaq.*

*Inuussutissarsiutigalugu piniarnermut allagartap atorsinnaassusia*

**§ 5.** Inuussutissarsiutigalugu piniarnermut allagartaq tassaavoq Piniarnermut Naalakkersuisoqarfip giro atorlugu akiliiffissaata akiliisimanermut upternarsaatitaa.

*Imm. 2. Inuussutissarsiutigalugu piniarnermut allagartap tunniunneqarnerani akiliuteqartitsisoqassaaq, § 2 naapertorlugu.*

*Imm. 3. Inuussutissarsiutigalugu piniarnermut allagartaq taamaallaat atuuppoq akiliisimaneq upternarsarsimagaangat atuuttarlunilu qaammatisiutit ukiuat allagartap atuuffissaa naallugu.*

Akiliisimanermut upternarsaat tassaavoq giro atorlugu akiliiffissami aningaaseriviup allakkeriviulluunniit naqitsisaa, webbank atorlugu akiliisimanermut upternarsaat imaluunniit allatut iliorluni paatsoorneqarsinnaangitsumik qularnaatsumillu nalunaarsuineq, akileqquneqartup akilersimaneranut upternarsaatitut atuuttoq.

**§ 6.** Inuussutissarsiutigalugu piniarnermut allagartamik piginnittoq Piniarneq aallaaniarnerlu pillugit Inatsisartut inatsisaanni inuussutissarsiutigalugu piniarnissamut piumasaqaatitut aalajangersakkat naammassinngippagit imaluunniit inuussutissarsiutigalugu piniarnermik aallaaniarnermillu ingerlatsinerminik unitsitsippat, tamanna kommunimut najugarisamut erngerluni nalunaarutigineqassaaq.

*Imm. 2. Najugarisami kommunerisap imm. 1 naapertorlugu nalunaarut Piniarnermut Naalakkersuisoqarfimmut ingerlateqqissavaa. Pineqartoq sunngiffimmi aallaaniarsinnaanermut allagartat pillugit Namminersorlutik Oqartussat nalunaarutaat malillugu sunngiffimmi piniarsinnaanermut allagartartaarnissaamut qinnuteqarsinnaavoq.*

**§ 7.** Inuussutissarsiutigalugu piniarnermut allagartaq piginnittumuinnaq tunngavoq allamullu tunniuteqquaananani, tuneqqusaananani atukkiateqquaananiluunniit.

*Imm. 2. Inuussutissarsiutigalugu piniarnermut allagartaq kinaassutsimut upternarsaammut atuuttumut ilanngullugu piniarnermi aallaaniarnermilu nassarnejartassaaq nakkutilliinermullu atatillugu politiit, piniarnermik aalisarnermillu nakkutilliisut, taakku ikiortaasa imaluunniit inuit tamatumunnga piginnaatitaasut piumasaqnerisigut takutinneqartassalluni.*

*Pisanik nalunaaruteqartarneq*

**§ 8.** Inuussutissarsiutigalugu piniarnermut allagartalik kinaluunniit pisussaavoq pisat tamarmiusut nalunaarsussallugit pissatat ilanngullugit. Pisanik nalunaarsuinissamut periarfissat marluusunit arlaat atorlugu pisinnaavoq:

1) Pisarisimasat qaammatit naaneri tamaasa naatsorsuusiorneqartassapput. Ukiutut pisarisimasat pillugit kisitsisit, imm. 2 naapertorlugu piffissap pisanik nalunaarsuiffiusussap naanerani, pisanik nalunaarsuiffissamut Piniarnermut Naalakkersuisoqarfimmit suliarineqarsimasumut

naatsorsuusiorneqassapput, oktoberillu ulluisa 15-iat tikitsinnagu utertinnejassallutik.

2) Pisarisimasat Internet-imik aallaavilik atorlugu oktoberip ulluisa 15-iat tikitsinnagu nalunaarsorneqassapput.

*Imm. 2. Piffissaq pisanik nalunaarsuiffiusussaq tassaavoq oktoberip ulluisa aallaqqataanniit septembarip ulluisa 30-iannut, ullut taakku ilanngullugit.*

*Imm. 3. Inuussutissarsiutigalugu piniarsinnaanermut allagartap nutarternissaanut tunngaviussaaq piffissamut pisanik nalunaarsuiffiusussamat qaangiuttumut pisanik nalunaarsuilluni immersuiffissap Piniarnermut Naalakkersuisoqarfimmi nalunaarsorneqarsimanissa, imm. 1 naapertorlugu.*

*Imm. 4. Inuussutissarsiutigalugu piniarnermut allagartartaarnissamat qinnuteqaatit suliarineqassanngillat pisanik nalunaarsuiffik, piffissami pisanik nalunaarsuiffiusussaatitaaffimmi siuliani, imm. 2 naapertorlugu, pisanik nalunaarsuiffimmik immersuiffissaq, imm 1, naapertorlugu immersorneqarluni nassiunneqarsimanngippat.*

#### *Immikkut akuersissuteqartarneq*

**§ 9.** Piniarnermut Naalakkersuisoq nalunaarummi matumani maleruagassat immikkut saneqqunneqarnissaannut akuersissuteqarsinnaavoq tamanna ilisimatuutut misissuinerit pisariaqartilersippassuk.

*Imm. 2. Inuussutissarsiutigalugu piniarnermut allagartassanik immikkut akuerineqarnissamik qinnuteqaat najugarisami kommunerisamut imaluunniit Piniarnermut Naalakkersuisoqarfimmut nalunaarutigineqassaaq immersuiffissaq Naalakkersuisoqarfimmit ilusilersugaq atorlugu imaluunniit imminut kiffartuuusseriaatsimi immersugassaq Naalakkersuisoqarfimmit ilusilersugaq atorlugu nalunaarutigineqassalluni.*

*Imm. 3. Imm. 2 naapertorlugu immikkut akuerineqarneq qaammatisiutit ukiuanni tunniunneqarfigisami atuutissaaq.*

#### *Pineqaatissiissutit*

**§ 10.** Piniarneq aallaaniarnerlu pillugit Inatsisartut inatsisaanni piniarsinnaanermut aallaaniarsinnaanermullu piumasaqaatinik uanilu nalunaarummi § 7, imm. 1-imik 2-millu kiisalu § 8, imm. 1-imik unioqqutitsisut akliliitsinikkut pineqaatissinneqarsinnaapput.

*Imm. 2. Piniarneq aallaaniarnerlu pillugit Inatsisartut inatsisaanni piniarsinnaanermut aallaaniarsinnaanermullu piumasaqaatinik aamma § 7, imm. 1-imik 2-millu unioqqutitsisoqartillugu pisat taakkuluunniit nalingat Kalaallit Nunaanni pinerluttulerinermik inatsit malillugu arsaarinnissutigineqarsinnaapput.*

#### *Atuutilerfia*

**§ 11.** Nalunaarut atuutilerpoq ulloq 1. januar 2015.

*Imm. 2. Tamatumunnga peqatigitillugu Inuussutissarsiutigalugu piniarnermut allagartat pillugit Namminersorlutik Oqartussat nalunaarutaat nr. 18, 9. oktober 2012-imeersoq atorunnaarsinneqarpoq.*

*Namminersorlutik Oqartussat, ulloq 30. december 2014.*

Karl-Kristian Kruse

/

Jørgen I. Olsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut